

ՆԷՊ-Ը ԵՎ ԳՅՈՒՂԱՑԻՈՒԹՅԱՆ ՇԵՐՏԱՎՈՐՈՒՄԸ

ՍՏԵՓԱՆՅԱՆ Ն. Ռ.

Հայաստանի խորհրդային իշխանությունը ծանր ժառանգություն ստացավ: Բազմիցս ավերված ու թալանված, գաղթականներով ու որբերով հեղեղված Հայաստանը տնտեսական խոր ճգնաժամի մեջ էր: Կանգ էին առել արդյունաբերական ձեռնարկությունները, իսկ գյուղատնտեսական ցանքատարածքները կրճատվել էին ավելի քան 4 անգամ¹: Ավերվել էր ոռոգման համակարգը, չէին աշխատում էլեկտրակայանները: Խորհրդային կարգերի հաստատման մասին 1920 թ. նոյեմբերի 28-ի հռչակագրում նշված է. «Քաղաքները ավեր, շենքերը ամայի ու անմարդաբնակ, երթուղին քարոքանդ, կանգ առած, ողբ ու կական, աղի արտասուք է ծորում Հայաստանի մի ծայրից մյուսը»²:

Այսպիսի ծանր պայմաններում հաստատելով խորհրդային իշխանություն՝ հեղկոմը, առանց լուրջ հաշվարկների, հետևելով Ռուսաստանի օրինակին, երկրում մտցրեց ռազմական կոմունիզմի քաղաքականություն: Սակայն հայկական գյուղում չկային կալվածատիրական և հարուստ տնտեսություններ, և բռնագրավումների ամբողջ ծանրությունն ընկավ գյուղական բնակչության վրա: Նոր քաղաքականությունը զանգվածային դժգոհությունների տեղիք տվեց: Հեղկոմը հարկադրված էր մի քանի ամիս անց վերանայել դա:

Ռազմական կոմունիզմի՝ խուզարկումների և բռնագրավումների քաղաքականությունը այլևս չէր նպաստում տնտեսության զարգացմանը: 1920 թ. սկզբներին խորացող համատարած տնտեսական ճգնաժամի դեմ պայքարի հիմնական ճակատը գյուղատնտեսական արտադրության վերականգնումն էր: Անհրաժեշտ էր բարձրացնել գյուղացիության անձնական շահագրգռվածությունը, բոլոր միջոցներով նպաստել նրա տնտեսության ամրապնդմանը, ավելացնել գյուղատնտեսական մթերքների արտադրությունը: Դա բանվորագյուղացիական դաշինքի ամրապնդման և սովի դեմ պայքարելու հիմնական միջոցն էր:

Կուսակցության X համագումարը (1921 թ. մարտ), ելնելով երկրի տնտեսական զարգացման պահանջներից, վերացրեց ռազմական կոմունիզմի քաղաքականությունը և մտցրեց նոր տնտեսական քաղաքականություն՝ նեպ: Թեև այդ ժամանակ ԽՍՀՄ-ը դեռևս չէր ձևավորվել, բոլոր հանրապետությունները, ներառյալ՝ Հայաստանը, հաշվի առնելով նեպի հիմնական սկզբունքները, այնուամենայնիվ, վերանայեցին իրենց տնտեսական քաղաքականությունը:

Նեպ-ին անցնելուց հետո, ի տարբերություն նախորդ փուլի, առաջին իսկ տարում սաստկացավ գյուղացիության՝ ավելի շատ և

¹ Социалистическое строительство Арм. ССР, 1920-40, Е., 1970, с. 23.

² Հոկտեմբերյան մեծ հեղափոխությունը և սովետական իշխանության հաստատումը Հայաստանում, Ե., 1960, էջ 403:

ավելի լավ հողեր սեփականացնելու ձգտումը: Ռուսաստանի բոլոր գավառներում 1922-1924 թթ. ավելացան ցանքատարածքները, բարձրացավ բերքատվությունը:

Նէպ-ի պայմաններում հարկ եղավ վերակառուցել ժողովրդական տնտեսության կառավարումը: 1921 թ. մայիսին ժողոնսխորհի կազմում ստեղծվեցին արդյունաբերության ճյուղային 16 գլխավոր վարչություններ: Առավել խոշոր ձեռնարկությունները կառավարելու նպատակով կազմակերպվեցին մոտ 430 տրեստներ: Կազմավորվեց կենտրոնական բանկը:

Մանր ապրանքային արտադրության, առևտրի, վարձակալության թույլտվությունը ավելի նպաստեց գյուղատնտեսական արտադրության բարձրացմանը և գյուղացիների նոր տիպի շերտավորմանը: Միջակ գյուղացին դարձավ ռուսական գյուղի հիմնական դեմքը: Խիստ կրճատվեցին չքավոր և բատրակային տնտեսությունները, սահմանափակվեց կուլակների գործունեությունը:

Խորհրդային իշխանությունը, անցնելով նէպ-ին, հաշվի էր առնում գյուղացիության մասնավոր սեփականատիրական հոգեբանությունը և նրա հետ մտնում առևտրական հարաբերությունների մեջ: Հասկանալի է, որ շուկայական հարաբերությունների վերականգնումն իր հերթին տանում էր դեպի կապիտալիստական տարրերի որոշակի աշխուժացում: Սակայն այլ ելք չկար: Փաստորեն, խորհրդային տնտեսության հետագա զարգացումը պետք է գնար ոչ թե կապիտալիզմի մնացուկների վերացման ուղիով, այլ դրանց զարգացման: Իշխանությունները կանխագգում էին վտանգը և միջոցներ ձեռնարկում կապիտալիզմի զարգացումը որոշակի շրջանակների մեջ պահելու համար: Այս պայմաններում բարձրանում էր պետության կարգավորիչ դերը:

Հայաստանի գյուղացիությունը հիմնականում ճիշտ ըմբռնեց նէպ-ի էությունը: Այսպես, նէպ-ին անցնելու առաջին տարվա համար սահմանված 700 հազար փութ պարենահարկի փոխարեն հավաքվեց և մուծվեց 726 հազար փութ³:

Հայաստանում նէպ-ին անցնելը ոչ միայն պատմական անհրաժեշտություն էր, այլև փրկության միակ ճիշտ ուղին՝ տնտեսությունը վերականգնելու և բնակչության ֆիզիկական գոյությունը պահպանելու համար:

Հայաստանի կառավարությունը 1921 թ. հունիսի 21-ին դեկրետ հրապարակեց «Պարենհարկի մասին», որով փաստորեն սկսվեց նոր տնտեսական քաղաքականությունը: Թեև այն վերաբերում էր ամբողջ ժողովրդական տնտեսությանը, այնուամենայնիվ, առաջնահերթ նշանակություն տրվեց գյուղատնտեսության զարգացմանը:

Գյուղատնտեսության վերականգնմանն ու զարգացմանն ուղղված առաջին ագրարային միջոցառումը 1920 թ. դեկտեմբերի 28-ի հեղկոմի դեկրետն էր՝ հողի մասնավոր սեփականության վերացման մասին⁴: Այդ դեկրետով կալվածատերերից, եկեղեցիներից, վանքե-

³ Հայաստանի ազգային արխիվ (այսուհետ՝ ՀԱԱ), ֆ.1, գ. 1. գ. 18, թ. 5:

⁴ Նույն տեղում, ֆ.1, գ. 12, գ. 29, թ. 15:

րից և մասամբ ունևոր տնտեսություններից բռնագրավվեց շուրջ 200 հազար հեկտար հող և անհատույց հանձնվեց գյուղացիությանը: Դա, իհարկե, չլուծեց սակավահողության հարցը: «Հայաստանում, - նշված է Լոռու գավառային գյուղացիական համագումարի որոշման մեջ, - հողերի բռնագրավումը չտվեց այն արդյունքը, ինչ որ մյուս հանրապետություններում: Նա ավելի շատ սկզբունքային, քան որևէ էական տնտեսական նշանակություն ունեցավ սակավահող գյուղացիության շահերի տեսանկյունից»⁵: Քանի որ երկրում խոշոր կալվածատիրական տնտեսություններ չկային, և հիմնականում մանր գյուղացիությունն էր իշխում, հողի ազգայնացումը չլուծեց ագրարային հարցը: Դրա լուծման հիմնական ուղիներն էին հողաշինությունը և ոռոգելի հողատարածքների ընդլայնումը: Այդ է պատճառը, որ նեպ-ին անցնելով՝ հատուկ ուշադրություն դարձվեց ջրաշինարարական աշխատանքներին⁶:

1921 թ. ապրիլի կեսին սկսվեցին ջրանցքների մաքրման և վերականգնման աշխատանքները: 1922-1923 թթ. վերականգնվեցին 430 ջրանցքային առուներ, վերանորոգվեցին 42 հիդրոտեխնիկական կառույցներ:

Նոր ջրանցքներ և ջրհան կայաններ (Էջմիածնի, Շիրակի, Շահումյանի, Կարճևանի, Սարդարապատի ջրանցքներ) կառուցվեցին 1920-ական թվականներին: Մինչև 1928 թ. նոր ոռոգելի հողերի աճը կազմեց 8.6 հազար հեկտար⁷: Դա բաժանվեց սակավագոր տնտեսություններին: 1922 թ. թույլատրվեց նաև հողի վարձակալությունը: Անասնա-գուրկ գյուղացիությունը ստացած հողը մշակել չէր կարողանում և վարձակալության էր տալիս հարուստներին: Դա ձեռնադր էր չքավոր գյուղացիությանը: Բավական ծանր էր անասնապահական շրջանների վիճակը. տարբեր գավառներում բացվեցին անասնաբուժարաններ, որոնք նպաստում էին ցեղայնության բարձրացմանը (Կամոյում, Լոռի-Փամբակում, Դիլիջանում, Մարտունիում և այլն): Ամենուր զգացվում էր գյուղգործիքների կարիք: Հիմնական գործիքներն էին գութանը, արորը և սայլը: 1924 թ. կար 5293 գութան և 22,3 հազար արոր, իսկ 1927 թ.՝ 13000 գութան և 50,4 հազար արոր: Այս ամենը չէր բավարարում գյուղացիության պահանջները:

Նեպ-ի տարիներին սակավահող տնտեսությունների վիճակը որոշ չափով բարելավելու նպատակով գյուղացիներին վերաբնակեցնում էին նոր յուրացված հողերի գոտում: Նրանց համար ստեղծվում էին բարենպաստ պայմաններ: 1928 թ. հոկտեմբերին ՀԽՍՀ կենտրոն-կոմի նախագահությունը որոշեց. «Այն գյուղացիներին, որոնք կտեղափոխվեն, համաձայն հողփոխառման մշակած ծրագրի, մի շրջանից մյուսը, ազատել բոլոր տեսակի հարկերից և հասարակա- կան պարտականություններից երեք տարի ժամանակով, հաշվելով 1929 թվականից»⁸:

⁵ Հայաստանի գյուղատնտեսությունը 40 տարում, Ե., 1960, էջ 47:

⁶ ՀԱՄ, ֆ.123, գ. 16, գ. 25, թ. 4:

⁷ ՀԽՍՀ կառավարություն, 1928 թ. հաշվետվություն, Ե., 1928, էջ 27:

⁸ ՀԱՄ, ֆ. 128, գ. 1, գ. 7, թ. 24:

Այսպիսով, իշխանությունների ձեռնարկած միջոցառումների շնորհիվ, նէպ-ի հետևողական կենսագործմամբ սեղմ ժամկետում վերականգնվեց գյուղատնտեսության նախապատերազմյան մակարդակը, գրեթե լիովին կարգավորվեցին հայկական գյուղում գոյություն ունեցող հողային բարդ և խճճված հարաբերությունները, գյուղացիությունը կարողացավ ստեղծել ամուր տնտեսություններ: Խորհրդային իշխանության ագրարային քաղաքականությունն արմատապես փոխեց գյուղի սոցիալական դեմքը և նախադրյալներ ստեղծեց գյուղացիության նոր տիպի շերտավորման համար: Նէպ-ի կենսագործունեությամբ գյուղում ոչ միայն տնտեսական, այլև քաղաքական լուրջ տեղաշարժեր էին տեղի ունենում:

Հայկական գյուղը հիմնականում սկսեց շերտավորվել 1923 թ. հետո, երբ նկատելիորեն նվազեց չքավորների քանակը, որոշ չափով աճեց կուլակների թիվը, և հիմնականում սկսվեց միջակ գյուղացիության առաջացումը: Միջակ գյուղացիությունը XIX դ. 20-ական թվականների ընթացքում դարձավ գյուղի հիմնական դեմքը և գյուղատնտեսական արտադրության հիմնական մասը կենտրոնացրեց իր ձեռքին: Դրան բոլոր միջոցներով օժանդակում էին իշխանության մարմինները:

Ինչպես նշվեց, նէպ-ով խրախուսվող շահագործողական ապրանքադրամային հարաբերություններից օգտվեց նաև կուլակությունը: Հատկապես առաջին տարիներին կուլակությունն արագ ամրապնդեց իր տնտեսությունը և լայնորեն ծավալեց շահագործողական գործունեություն (վարձով էր տալիս գյուղգործիքները, քաշող ուժը, սերմացուն, վարձում չքավորների հողերը և այլն): Սակայն պրոլետարիատի դիկտատուրան հնարավոր միջոցներով սահմանափակում էր կուլակային տնտեսությունների աճը:

Նէպ-ի տարիներին անընդհատ ամրապնդվող կուլակային տնտեսությունների կողքին զգալի թիվ էր կազմում անհող և անասնազուրկ գյուղացիությունը: «Հայաստանում այնպիսի սոցիալական պրոցեսներ են տեղի ունենում, - նշվեց ՀԿ(Բ)Կ III հանրագումարում (1924 թ.), որ մի կողմից կուլակն է առաջ գալիս, մյուս կողմից շերտավորված բատրակներն ու չքավոր գյուղացիությունը»⁹:

Հայաստանում գյուղի շերտավորմանն առանձնապես խթանում էր գաղթականությունը, որի հիմնական մասը ծանր վիճակի մեջ էր և հաճախ դիմում էր կուլակների օգնությանը:

Սակայն գյուղացիության տարբեր շերտերի ոչ հստակ սահմանման և կյանքում դրանց սահմանազատման դժվարությունները հաճախ գյուղացիության դժգոհության պատճառ էին դառնում: Գյուղացիության շերտավորման հիմքում, ինչ խոսք, ընկած էին ցանքատարածքները, անասնազլխաքանակը, գործիքները և այլն: Սակայն միայն մեխանիկական տվյալներով, առանց նրանց եկամուտները հաշվի առնելու դժվար է ճիշտ սահմանազատել գյուղացիության տարբեր շերտերը: «Իրական կյանքի մեջ, - նշված է 1926 թ. մի հետազոտությունում, - տնտեսությունները այնպես են մոտենում իրար

⁹ ՀԱՍ, ֆ. 1, գ. 44, գ. 1, թ. 22:

իրենց կարողությամբ, որ ներկայացնում են մի միաձույլ սյուն, որն ունի երկու հակադիր՝ հաստ և բարակ ծայրեր և միջին մաս, բայց որտեղից է սկսվում այդ միջինը և որտեղ վերջանում՝ դժվար է որոշել»¹⁰։ Իսկ ՀԿԿ Կենտկոմ ուղարկված զեկույցներից մեկում նշվում է. «Որոշակիություն չկա չքավոր գյուղացուն ճիշտ բնորոշելու գործում, մի դեպքում չքավոր են համարում նրանց, ովքեր հողից բացի ոչինչ չունեն, մի այլ դեպքում հող և մի գույգ եզ ունեցողներին»¹¹։ Հասկանալի է, որ շերտավորման մեջ հարաբերական պահը միշտ էլ կա, բայց չի կարելի այն ամբողջությամբ հարաբերական համարել։

Հարկ է նշել, որ հանրապետությունում գյուղացիության շերտավորումը հավասարաչափ չէր տեղի ունենում։ Արարատյան հարթավայրի քաղաքամերձ շրջաններում, որպես կանոն, այն ավելի արագ տեմպերով էր ընթանում՝ կապված ապրանքադրամային հարաբերությունների զարգացման հետ։ Իսկ լեռնային շրջաններում, որտեղ բնակչության հիմնական մասը զբաղված է անասնաբուծությամբ, շերտավորումը զգալիորեն դանդաղ էր ընթանում։ Այստեղ խորն էր բևեռացումը։ Կային ակնհայտ հարուստներ և տարրական միջոցներից զուրկ հազարավոր չքավորներ։

Գյուղի շերտավորման հարցերը մշտապես իշխանությունների ուշադրության կենտրոնում էին։ 1925-1926 թթ. վիճակագրական ընտրովի ուսումնասիրությունը ցույց տվեց, որ գյուղացիության հիմնական մասը չքավորներն էին, որոնք կազմում էին ընդհանուրի 80%-ը, իսկ կուլակային տնտեսությունները՝ մոտ 2,5%-ը։ Վիճակագրական տվյալները վկայում են նաև, որ միջակացման և կուլակային աճի տեմպերը բավական դանդաղ էին՝ պայմանավորված տնտեսության քայքայմամբ, սակավահողությամբ, գաղթականության հարցերով և այլն։

Չնայած գյուղացիության շերտավորման մասին գոյություն ունեցող տարբեր կարծիքներին՝ իրականությանն ավելի մոտ է ըստ գյուղատնտեսական հարկի կատարած խմբավորումը։ Այդ տվյալների համաձայն՝ 1929-1930 թթ. գյուղի շերտավորումը հետևյալ պատկերն ուներ. չքավորները՝ 58%, միջակները՝ 40.5%, կուլակները՝ 1.5%¹²։

Ուշագրավ է, որ ունևոր խավն ավելի մեծ ակտիվություն էր դրսևորում, քան մյուսները։ Օգտագործելով տնտեսական միջոցները՝ կուլակները հաճախ հանդես էին գալիս որպես ողջ աշխատավորության շահերի արտահայտիչ։ «Գյուղում աղքատները ավելի կապված են հարուստների հետ, քան միջակների, նշված է Արագածի շրջանային կուսկոնֆերանսի որոշման մեջ, որովհետև հարուստները ի դեմս հարկին՝ օգնության են գալիս չքավորությանը, նրան պարտքով փող են տալիս, օգնում հացահատիկով և այլն»¹³։ Ավելին,

¹⁰ Գեղամյան Գ., Նեպ-ը և սոցիալ-տնտեսական փոփոխությունները Հայաստանում, Ե., 1978, էջ 121։

¹¹ Նույն տեղում, էջ 8։

¹² ՀԱՍ, ֆ. 1, գ. 15, գ. 8, թ. 32։

¹³ ՀԱՍ, ֆ. 1, գ. 37, թ. 10։

ձեռք բերելով տնտեսական հաջողություններ, կուլակները փորձում են վարել նաև հասարակական ակտիվ գործունեություն: 1926 թ. գյուղխորհրդի ընտրությունների ժամանակ զգալիորեն աճել է ունևորների տեսակարար կշիռը: Բացի դրանից, նրանք առևտրական կետեր էին բացում գյուղերում և բնակչությանն առաջին անհրաժեշտության ապրանքներ մատակարարելով՝ շուկայական կախման մեջ գցում իրենցից:

Ինչպես նշվեց, նէպ-ի առաջին փուլում պետականորեն թույլատրվեցին վարձակալական հարաբերությունները: Անշուշտ, դա տարբերվում էր նախկինից: Այժմ ոչ թե չքավորներն էին վարձում ունևորների հողերը, այլ ընդհակառակը՝ արտադրության միջոցներից զուրկ գյուղացիությունն էր հողը մշակել տալիս ունևորներին: Թեև դա նպաստում էր կուլակային շահագործմանը, այնուամենայնիվ, հիմնականում բխում էր նաև չքավորության շահերից: Այստեղ մեծ էր պետության կարգավորիչ դերը: «Մեր տնտեսական զարգացման խաղաղ պայմաններում, - նշեց ՀԿԿ III պլենումը, - մենք կարող ենք կուլակների զարգացումը դնել նեղ շրջանակների մեջ և կանխել պայքարի սուր ձևերը»¹⁴:

Մակայն դա միշտ չէր հաջողվում: Ունևորները դիմում էին զանազան միջոցների՝ իրենց դասակարգային պատկանելությունը քողարկելու համար: 1920-ական թթ. կուլակը շատ էր տարբերվում իր նախախորհրդային շրջանի տգետ կամայական նախորդներից: Առևտրավաշխառուական գործունեությունը նրան ավելի ճարպիկ էր դարձել: 1926 թ. խորհուրդների ընտրությունների ժամանակ նրանք ձգտում էին իրենց ներկայացուցիչներն ընտրել գյուղխորհուրդներում, իսկ եթե դա չէր հաջողվում, ընտրում էին իրենցից կախման մեջ գտնվող որևէ չքավորի կամ բատրակի¹⁵:

Դաշնակցելով գյուղի նեպմանական տարրերի հետ՝ կուլակությունը փորձում էր իր կողմը գրավել գյուղացիության հիմնական մասին: Իշխանությունները հնարավոր միջոցներով պայքարում էին նրանց դեմ՝ փորձելով արտամղել տնտեսական և հասարակական կյանքից: 1928-1929 թթ. նրանց հիմնական մասը, որպես հանրօգուտ աշխատանքներով չգբաղվող, ձայնագուրկ արվեց: Սովորաբար ձայնագուրկների վրա անհատական (բարձր) հարկ էր նշանակվում և արգելվում տնտեսության մյուս ճյուղերում աշխատել: Կուլակային տնտեսության զարգացումը սահմանափակելու ներգործուն միջոցը հարկային և վարկային քաղաքականությունն էր: 1928-1929 թթ. գյուղհարկից ազատվել էր գյուղացիության 46%-ը (չքավոր տնտեսություններ), նորմալ հարկատու էր 52,4%-ը (միջուկը), և անհատական կարգով հարկվելու էր 1,6%-ը (կուլակ)¹⁶: Հանրապետության տարբեր շրջաններում այդ տվյալները տարբեր էին (հաշվի առնելով յուրաքանչյուր ընտանիքի եկամուտները):

¹⁴ ՀԱՍ, ֆ. 1, գ. 1, 20 և 21 թ. 16:

¹⁵ Նույն տեղում, ֆ. 1, գ. 1, 20 և 21 թ. 16:

¹⁶ Նույն տեղում, ֆ. 1, գ. 4, գ. 201, թ. 16:

1926 թ. վիճակագրական տվյալներն ամփոփելով՝ ՀԿ (բ) VI համագումարը նշեց. «Այժմյան հայկական գյուղի սոցիալական դեմքը բնորոշվում է՝ ա) միջակ գյուղացու գերակայությամբ, որը գյուղի հիմնական դեմքն է դարձել, բ) Անցյալի գյուղի ծանր ժառանգության շնորհիվ մինչև այժմ դեռևս շատ բարձր է չքավոր տնտեսությունների տոկոսը, գ) շերտավորման պրոցեսի շարունակության շնորհիվ որոշ չափով աճում են նաև կուլակները»¹⁷: Իշխանության մարմինները ձգտում էին կուլակներին մեկուսացնել չքավորներից ու միջակներից:

Այսպիսով, 1920-ական թվականներից Հայաստանում կենսագործվող նեպ-ի շնորհիվ՝ գյուղատնտեսությունը բռնեց անշեղ վերելքի ուղին՝ սերտ ժամկետում գերազանցելով նախապատերազմյան մակարդակը: Սակայն դա նախկին մակարդակի վերականգնումը չէր: Խորհրդային իշխանության ակտիվ միջամտությամբ փոխվեց գյուղի սոցիալական դեմքը, գյուղում տեղի ունեցան շերտավորման նոր գործընթացներ: Չքավորների ու բատրակների կրճատման հաշվին գյուղի հիմնական դեմքը դարձավ միջակ գյուղացիությունը, որը գյուղատնտեսական մթերքների հիմնական արտադրողն էր: Թեև այդ տարիներին որոշ չափով աճեց նաև կուլակության թիվը, սակայն, ըստ էության, նա մեկուսացվեց գյուղացիական մյուս շերտերից և արտամղվեց ինչպես տնտեսական, այնպես էլ հասարակական-քաղաքական ակտիվ գործունեության ասպարեզից: Զգալիորեն նվազեց չքավոր գյուղացիության տեսակարար կշիռը:

НЭП И РАССЛОЕНИЕ КРЕСТЬЯНСТВА

СТЕПАНЯН Н. Р.

Резюме

В Армении переход к нэпу произошел в особых условиях, а именно: малоземелья, экономической разрухи, отсутствия техники, что отразилось на экономике республики. Нэп призван был восстановить экономику Армении и спасти ее население от голода. В результате проведенной аграрной политики в деревне произошел новый процесс расслоения, вследствие чего уменьшилось число бедняков и батраков, середняк стал основной фигурой деревни, кулачество же было вытеснено как из экономической, так и общественно-политической сферы.

¹⁷ Նույն տեղում, ֆ. 1, գ. 18, գ. 7, թ. 12: